



ՀՀ ԱՐՄԱՎԻՐԻ ՄԱՐԶ  
ԷԶՄԻԱԾԻՆ ՀԱՄԱՅՆՔԻ ՂԵԿԱՎԱՐ

Ո Ր Ո Շ Ո Ւ Մ Թ Ի Վ 688

22 2018թ.

ք. Էջմիածին

ԷԶՄԻԱԾԻՆ ՔԱՂԱՔԻ <<ԷԶՄԻԱԾԻՆ ԲԺՇԿԱԿԱՆ ԿԵՆՏՐՈՆ>> ՓԲԸ-Ի ԾՆՆԴԱՏԱՆ ՄԱՍՆԱՇԵՆՔԻ  
ԴԻՄԱՑ ՀՈՂՈԳՏԱԳՈՐԾՄԱՆ ՍԱՀՄԱՆԱՆԻՇԵՐԸ ՈՇՆՉԱՑՆԵԼՈՒ ՀԱՄԱՐ ՏՈՒԳԱՆՔԸ  
ՆՇԱՆԱԿԵԼՈՒ ՄԱՍԻՆ

Էջմիածին համայնքի ղեկավարը, քննության առնելով թիվ 2/1 վարչական գործը՝ Էջմիածին քաղաքի <<Էջմիածին բժշկական կենտրոն>> ՓԲԸ-ի ծննդատան մասնաշենքի դիմաց հողօգտագործման սահմանանիշերը ոչնչացնելու համար տուգանքը նշանակելու մասին, պարզեց որ

Հայրիկ Գեղամի Սարգսյանը (հասցե՝ Արարատի մարզ, Կանաչուտ գյուղ, Ա. Սարգսյան փողոց, թիվ 18 տուն, ն/ք 000941989), Էջմիածին քաղաքի <<Էջմիածին բժշկական կենտրոն>> ՓԲԸ-ի ծննդատան մասնաշենքի դիմաց խախտելով Վարչական իրավախախտումների վերաբերյալ Հայաստանի Հանրապետության օրենսգրքի 58-րդ հոդվածի 1-ին մասով սահմանված պահանջները, առանց համապատասխան քաղաքաշինական փաստաթղթերի ու համապատասխան իրավասու մարմինների համաձայնության, իրականացրել է հողօգտագործման սահմանանիշերի ոչնչացման աշխատանքներ՝ ապամոնտաժելով եզրաքարերը և դրանց կից, որպես աստիճաններ ծառայող քարերը, որոնք փաստորեն հանդիսացել են սահմանանիշ տրանսպորտի երթևեկությունը այդ մասում սահմանափակելու համար, ինչի համար օրենքով սահմանված կարգով նախատեսված է տուգանքի նշանակում՝ սահմանված նվազագույն աշխատավարձի երեսնապատիկի չափով, ինչի կապակցությամբ ՀՀ Արմավիրի մարզպետի և ՀՀ ոստիկանության Արմավիրի մարզային վարչության Վաղարշապատի բաժնի պետի գրությունների հիման վրա Էջմիածնի համայնքապետարանի աշխատակազմի քաղաքաշինության և հողօգտագործման բաժնի 31.08.2018թ. արձանագրության հիման վրա 2018 թվականի սեպտեմբերի 12-ին <<Վարչարարության հիմունքների և վարչական վարույթի մասին>> Հայաստանի Հանրապետության օրենքի 30-րդ հոդվածի 1-ին մասի <<բ>> ենթակետի և նույն օրենքի 34-րդ հոդվածով սահմանված կարգով, Վարչական իրավախախտումների վերաբերյալ Հայաստանի Հանրապետության օրենսգրքի 58-րդ հոդվածի 1-ին մասի պահանջների խախտման փաստով հարուցվել է վարչական վարույթ։ Էջմիածնի համայնքապետարանի վարչական իրավախախտման դեպքերով հարուցված վարչական վարույթի շրջանակներում գործերի ուսումնասիրման, նախապատրաստման և հաշվառման աշխատանքների իրականացման հանձնաժողովը /այսուհետ՝ հանձնաժողով/ հրավիրել և անցկացրել է լսում Հայրիկ Գեղամի Սարգսյանի մասնակցությամբ։

Վարչական ակտն ընդունելու համար հիմք հանդիսացող փաստերը

• ՀՀ Արմավիրի մարզպետի և ՀՀ ոստիկանության Արմավիրի մարզային վարչության Վաղարշապատի բաժնի պետի գրությունների հիման վրա Էջմիածնի համայնքապետարանի աշխատակազմի քաղաքաշինության և հողօգտագործման բաժնի աշխատակիցների կողմից Էջմիածին քաղաքի <<Էջմիածին բժշկական կենտրոն>> ՓԲԸ-ի ծննդատան մասնաշենքի տարածքում հայտնաբերված հողօգտագործման սահմանանիշերը ոչնչացնելու կապակցությամբ 31.08.2018թ. կազմված արձանագրությունը ու տեղագնության ակտը։

• Քաղաքաշինության և հողօգտագործման բաժնի աշխատակիցների կողմից 04.09.2018թ. թիվ 1522 գրությամբ Հայրիկ Գեղամի Սարգսյանը նախազգուշացվել է հողօգտագործման սահմանանիշերը

վերականգնելու մասին: Լրացուցիչ կատարված տեղատեություններ պարզվել է, որ քաղաքացի Հայրիկ Գեղամի Սարգսյանի կողմից որևէ միջոց չի ձեռնարկվել սահմանանիշները վերականգնելու ուղղությամբ:

• Տարածքի լուսանկարահանման փաստաթղթերը:

<<Վարչարարության հիմունքների և վարչական վարույթի մասին>> ՀՀ օրենքով սահմանված կարգով հարուցված և իրականացված վարչական վարույթի ընթացքում գործի փաստական հանգամանքների բազմակողմանի, լրիվ և օբյեկտիվ քննության արդյունքում, բացահայտելով գործի բոլոր հանգամանքները և հիմք ընդունելով վերոհիշյալ փաստերը, վարչական մարմինը հաստատված է համարում հետևյալը.

1. Արարատի մարզի, Կանաչուտ գյուղի, Ա. Սարգսյան փողոցի, թիվ 18 տան բնակիչ Հայրիկ Գեղամի Սարգսյանի կողմից, Էջմիածին քաղաքի <<Էջմիածին բժշկական կենտրոն>> ՓԲԸ-ի ծննդատան մասնաշենքի դիմաց, առանց համապատասխան քաղաքաշինական փաստաթղթերի ու համապատասխան իրավասու մարմինների համաձայնության, իրականացվել է հողօգտագործման սահմանանիշերի ոչնչացման աշխատանքներ, ուստի քննարկվող արարքը հանդիսանում է Վարչական իրավախախտումների վերաբերյալ Հայաստանի Հանրապետության օրենսգրքի 58-րդ հոդվածի 1-ին մասով սահմանված պահանջների խախտման հիմքեր պարունակող իրավախախտում.

2. Էջմիածին քաղաքի <<Էջմիածին բժշկական կենտրոն>> ՓԲԸ-ի ծննդատան մասնաշենքի դիմաց գտնվող հողամասը անհատույց օգտագործման իրավունքով տրամադրված է <<Էջմիածին բժշկական կենտրոն>> ՓԲԸ-ին, սակայն հանդիսանում է համայնքի սեփականությունը: Հողամասի հատակագիծը և նկարագրությունը, սահմանանիշերի տեղադրումը կատարվել են հողամասն ստացողի միջոցների հաշվին: Նշված տարածքում անցկացվել են սահմանանիշեր, որպեսզի սահմանափակվի տրանսպորտի երթևեկությունը այդ մասում և դրա շնորհիվ ապահովվի հիվանդանոցի այցելուների անվտանգ տեղաշարժը տարածքում, տարանջատելով երթևեկելի մասը հետիոտնի համար նախատեսված հատվածից:

Փաստորեն Հայրիկ Գեղամի Սարգսյանը 2018թ-ի օգոստոսի 8-ին ժամը 20:30-ին առանց որևէ օրենքով սահմանված թույլտվության, ապօրինի կարգով, շինարարական տեխնիկայով քանդել է <<Էջմիածին բժշկական կենտրոն>> ՓԲԸ-ի ծննդատան մասնաշենքի դիմաց գտնվող եզրաքարերը և դրանց կից, որպես աստիճաններ ծառայող քարերը, փակ ճանապարհը փորձելով դարձնել անցանելի մեքենաների համար, որը մեծ վտանգ է ներկայացնում հիվանդանոցի այցելուների համար, ինչի մասին եղել է նաև <<Էջմիածին բժշկական կենտրոն>> ՓԲԸ-ի տնօրենի ահազանգը:

Նշված փաստական հանգամանքները հաշվի առնելով՝ 2018 թվականի սեպտեմբերի 12-ին <<Վարչարարության հիմունքների և վարչական վարույթի մասին>> ՀՀ օրենքի 30-րդ հոդվածի 1-ին մասի <<բ>> կետի հիմքով Էջմիածնի համայնքապետարանում հարուցված վարչական վարույթի շրջանակներում 2018 հոկտեմբերի 4-ին հրավիրվել է լսում, որին մասնակցելու նպատակով պատշաճ ծանուցվել է /հիմք՝ 12.09.2018թ.-ի փոստ. անդորրագիր AG011533535AM/ քաղաքացի Հայրիկ Գեղամի Սարգսյանը:

Վերջինս ներկայանալով վարչական վարույթի լսումներին, հայտնել է, որ իր արարքը չի համարում իրավախախտում ու գտնում է որ սահմանանիշը դժվարեցրել է հիվանդանոցի այցելուների մուտքը հիմնարկ:

Արդյունքում հանձնաժողովը արձանագրություն է կազմել և առաջարկել՝ վարույթի մասնակից Հայրիկ Գեղամի Սարգսյանին ենթարկել վարչական պատասխանատվության և նշանակել վարչական տույժ սահմանված նվազագույն աշխատավարձի երեսնապատիկի չափով՝ 30 000 / երեսուն հազար /ՀՀ դրամ:

**Վարչական ակտ ընդունելու հիմնավորումը.**

Համաձայն <<Տեղական ինքնակառավարման մասին>> ՀՀ օրենքի 35-րդ հոդվածի առաջին մասի 26-րդ կետի՝ համայնքի ղեկավարը, օրենքով նախատեսված դեպքերում և կարգով անձանց ենթարկում է վարչական պատասխանատվության:

Համաձայն <<Տեղական ինքնակառավարման մասին>> ՀՀ օրենքի 43-րդ հոդվածի երկրորդ մասի 3-րդ կետի՝ համայնքի ղեկավարը, որպես պետության պատվիրակված լիազորություն, օրենքով սահմանված կարգով ապահովում է համայնքի տարածքում գտնվող գեոդեզիական կետերի և համայնքի սահմանանիշերի պահպանությունը:

Հայաստանի Հանրապետության հողային օրենսգրքի 43-րդ հոդվածի առաջին մասի 3-րդ կետի համաձայն՝ համայնքի ղեկավարը վերահսկողություն է իրականացնում՝ հողօգտագործման սահմանների և սահմանանիշերի պահպանման նկատմամբ:

Նույն հոդվածի երկրորդ մասի համաձայն՝ համայնքի ղեկավարը կանխարգելում, կասեցնում և վերացնում է ապօրինի հողօգտագործումը համայնքի վարչական սահմաններում, օրենքով սահմանված դեպքերում ու կարգով հողային օրենսդրության պահանջները խախտողների նկատմամբ կիրառում է վարչական տույժեր, ինչպես նաև իրավասու մարմիններ է ներկայացնում հաղորդումներ՝ իրավախախտում թույլ տված անձանց՝ օրենքով սահմանված պատասխանատվության ենթարկելու վերաբերյալ:

Վարչական իրավախախտումների վերաբերյալ Հայաստանի Հանրապետության օրենսգրքի 58-րդ հոդվածի առաջին մասին համաձայն՝ հողօգտագործման սահմանները խախտելը կամ սահմանանիշերը ոչնչացնելը՝

առաջացնում է տուգանքի նշանակում քաղաքացիների նկատմամբ՝ սահմանված նվազագույն աշխատավարձի երեսնապատիկի չափով:

Ելնելով վերոգրյալից և ղեկավարվելով <<Տեղական ինքնակառավարման մասին>> ՀՀ օրենքի 35-րդ հոդվածի առաջին մասի 26-րդ կետով, 43-րդ հոդվածի 3-րդ կետով, Վարչական իրավախախտումների վերաբերյալ ՀՀ օրենսգրքի 58-րդ հոդվածով, ՀՀ հողային օրենսգրքի 43-րդ հոդվածով և <<Վարչարարության հիմունքների և վարչական վարույթի մասին>> ՀՀ օրենքի 53-րդ, 58-60-րդ հոդվածներով՝

#### ՈՐՈՇՈՒՄ ԵՄ

1. Հայրիկ Գեղամի Սարգսյանի նկատմամբ տուգանք նշանակել Էջմիածին քաղաքի <<Էջմիածին բժշկական կենտրոն>> ՓԲԸ -ի ծննդատան մասնաշենքի դիմաց հողօգտագործման սահմանանիշերը ոչնչացնելու համար, 30 000 /երեսուն հազար / ՀՀ դրամ գումարի չափով:

2. Որոշման կատարման ընթացքի նկատմամբ հսկողության ապահովումը հանձնարարել Էջմիածնի համայնքապետարանի աշխատակազմի քարտուղարին:

3. Սույն որոշումը կարող է դատական կարգով բողոքարկվել ՀՀ վարչական դատարան՝ <<Վարչարարության հիմունքների և վարչական վարույթի մասին>> ՀՀ օրենքի 70-րդ և ՀՀ վարչական դատավարության օրենսգրքի 73-րդ հոդվածներով նախատեսված կարգով՝ դրա ուժի մեջ մտնելու օրվանից երկամսյա ժամկետում:

4. Սույն որոշման պահանջները չկատարելու դեպքում, <<Վարչարարության հիմունքների և վարչական վարույթի մասին>> ՀՀ օրենքի 88-րդ հոդվածով սահմանված կարգով այն ենթակա է հարկադիր կատարման՝ ՀՀ ԱՆ ԴԱՀԿ ծառայության միջոցով՝ անբողոքարկելի դառնալուց հետո եռամսյա ժամկետում:

5. Սույն որոշումն ուժի մեջ է մտնում կողմերին իրազեկելուն հաջորդող օրվանից կամ սույն որոշմամբ ուղղակիորեն շոշափվող անձանց վերաբերյալ տեղեկությունները հայտնի չլինելու դեպքում հրապարակման պահից, azdarar.am կայքի և /կամ համայնքապետարանի տեղեկագրերում հրատարակելու միջոցով:

ԷԶՄԻԱԾՆԻ ՀԱՄԱՅՆՔԻ ՂԵԿԱՎԱՐԻ  
ՊԱՇՏՈՆԱԿԱՏԱՐ

Դ.ԳԱՍՊԱՐՅԱՆ

